

Hero Komuniti UniSZA pupuk semangat sukarelawan

Oleh NURFARDLINA IZZATI MOKTAR 01 Mei 2024 09:17am Masa membaca: 4 minit



Muhammad Nasir (tengah) bersama Mohd Hafiz (kanan) semasa program Majlis Pelancaran Kesukarelawanan Hero Komuniti Fakulti Sains Sosial Gunaan di UniSZA, pada Selasa.

KUALA NERUS - Kesukarelawanan Hero Komuniti mampu memupuk semangat kepada pelajar Universiti Sultan Zainal Abidin (UniSZA) untuk terus menyumbang tenaga secara sukarela kepada masyarakat dan negara dalam pelbagai platform.

Timbalan Naib Canselor Hal Ehwal Pelajar dan Alumni (HEPA) UniSZA, Profesor Madya Datuk Ts Dr Mohd Hafiz Yusoff berkata, program sedemikian dapat mendedahkan kepada pelajar kepada kehidupan sebenar masyarakat selain menghidupkan budaya sukarelawan menerusi pelbagai khidmat komuniti.

"Seramai 74 pelajar menyertai program Kesukarelawanan Hero Komuniti Fakulti Sains Sosial Gunaan ini yang bertujuan memberi semangat kepada pelajar untuk menyumbang terhadap komuniti dalam apa konsep sekali pun.

"Program ini juga menjadi penggerak aktiviti komuniti dan kemanusiaan selain memupuk semangat kemasyarakatan.

"Dalam perancangan jangka masa panjang ia mampu menjadikan pelajar cepat menyesuaikan diri dengan keadaan baharu serta sentiasa mencari peluang untuk beri sumbangan pada komuniti," katanya.

Beliau berkata demikian kepada pemberita selepas Majlis Pelancaran Kesukarelawanan Hero Komuniti Fakulti Sains Sosial Gunaan di UniSZA di sini pada Selasa.

Turut hadir, Penasihat Bersama Kumpulan Karang kraf, Datuk Muhammad Nasir Hamzah.



Muhammad Nasir (tiga dari kiri) bersama Mohd Hafiz (tengah) ketika program melepaskan hampir seratus burung merpati ke udara sebagai tanda solidariti kepada Palestin.

Mengulas lanjut, Mohd Hafiz berkata, pihaknya menggalakkan penganjuran program yang mempunyai banyak pengisian terutama melibatkan konsep kepimpinan, kesukanan, kesukarelawan dan sebagainya.

"Di setiap fakulti kita amat galakkan mahasiswa supaya terlibat serta membangunkan program-program bersifat kemasyarakatan dan khidmat bakti pada komuniti," ujarnya.



Acara melepaskan burung merpati di Padang New Zealand di UniSZA sebagai tanda solidariti kepada Palestin.

Sementara itu, Mohd Hafiz berkata, pihaknya turut mengadakan program melepaskan hampir seratus burung merpati ke udara sebagai tanda solidariti kepada Palestin.

"Selesai sahaja program (Majlis Pelancaran Kesukarelawan Hero Komuniti), kita adakan program melepaskan burung merpati di Padang New Zealand di UniSZA ini sebagai simbolik kepada solidariti terhadap 'Free Gaza' dan 'Free Palestin'.

"Program ini juga dapat memberi kesedaran kepada semua pihak terhadap perjuangan menentang rejim Zionis selain berdoa untuk rakyat di Palestin agar sentiasa diberi ketabahan dalam mengharungi cabaran di sana," ujarnya.